

# PM lancar buku Allahyarham Tun Ghafar

UM-14/11/2006

KUALA LUMPUR 13 Nov. - Perdana Menteri, Datuk Seri Abdullah Ahmad Badawi hari ini melancarkan buku *Penitikan-ku* yang merupakan catatan peribadi bekas Timbalan Perdana Menteri dan Timbalan Presiden UMNO, Allahyarham Tun Ghafar Baba.

Buku setebal 175 halaman itu mengandungi catatan tentang apa yang terlintas dalam pemikiran pemimpin itu sepanjang penglibatannya dalam politik dan keluarga.

Ia dilancarkan di Pusat Dagangan Dunia Putra (PWTC) di sini sempena Perhimpunan Agung UMNO ke-57.

Turut hadir pada majlis pelancaran tersebut ialah Timbalan Perdana Menteri, Datuk Seri Najib Tun Razak.

Menurut anaknya, Tamrin Ghafar, judul buku itu merupakan ilham ayahnya.

"Buku ini mengandungi catatan peribadi Allahyarham Ghafar yang ditulis sendiri oleh

ayah bermula dari 18 Februari 1925 hingga 24 April 2006.

"Kita menerbitkan buku ini mengikut apa yang terkandung dalam catatan itu tanpa mengubah atau menambah sebarang ayat," katanya kepada *Utusan Malaysia* ketika ditemui pada majlis pelancaran itu.

Menurut Tamrin, buku itu dijual pada harga RM95 dan hasil jualannya akan disumbangkan kepada Tabung Bersamamu TV3.

"Allahyarham berasal daripada keluarga miskin, maka impian ayah adalah untuk membantu mereka yang hidup dalam keadaan susah," katanya.

Allahyarham Ghafar yang dilahirkan pada 18 Februari 1925 merupakan antara pejuang awal UMNO.

Bekas guru itu menjadi Timbalan Perdana Menteri dari 1986 hingga 1993. Beliau meninggal dunia pada 23 April lalu.